

姜先生全集



姜先生全集



葦間詩集卷二

全集二十六

邑後學

馮保燮

重編

王定祥

始發聞雁

帆挂不可止登程易落暉
舊山別欲盡鄉語聽還非
江暗水生碧村孤人去稀
客心羨征鴈轉得夜深歸
胥口放舟

數年吳地幾回經
愛說人間小洞庭
五郡水連天際碧
兩山春合望中青
崇岡迤邐蟠邨舍
密樹芊眠隱釣汀
薄暮煙波無處所
欲投人宿雨冥冥

自西山還光福晚步虎山橋

日日探幽險自攀薜衣猶挂白雲閒
虎山古廟登臨裏龍渚新遊極目間
次第漁船歸夕照微茫煙火出林灣
關情早被浮鷗覺故逐春波戲不還

盲詞妓

拂拭琵琶斜倚闌尋春無路憶春殘
微風入袖知絃滑流水生波覺柱安
纔到夢魂驚淚冷空持笑語對人難
坐中爲有巫山隔故撥朱絲不忍彈

諸君乾一枉顧江陰寓次不遇投詩而去奉和

一首

題詩忽復去終日想高蹤江上回孤棹雲間出九峯
門深疏薜荔佩涇冷芙蓉欲問羊求徑煙迷更幾重
送程別駕自潤州遷皖郡司馬

風流三晉舊才名別傳遙分綺繡城橋連丁卯千艘
疾樓瞰芙蓉百雉明轉輸直上天邊去嘯詠時時倚
江樹射堂春覆竹梧陰流眄雄圖酬佳句卓鐵城臨
大道旁埋金山下赤龍藏據石人看擬諸葛磨崖字
洗出華陽

君嘗摹刻
瘞鶴銘

鏡吹沈沈天半舉畫帆隱隱來

江滸山童百隊候星車津吏三更報潮鼓南征北宦
幾間關誰似君侯意氣閒擊汰乍離楊子岸迴帆早

見皖公山皖山千里共封域本是江南舊舒國隋家
司馬重賢良漢代廬江控南北巍巍天柱出雲霄玉
帛曾經萬國朝只今 聖主薄封禪駐馬還應賦寂
寥

蘭雪堂晚酌

虛堂微雨歇天際晚涼來樹密易成夜池深尙隱雷
驚蟬翻葉動弱鳥傍巢回余意會有適能無旅思催

月下

冪冪清輝滿竹林興闌撫事獨悲吟交游半爲貧窮
益隱忍翻因感激深望裏江山愁裏過閒時骨肉別

時心欲知此夜相思苦看取霜華兩鬢侵

魯文遠署席上聽歌四首

華堂碧樹敞新秋小隊雲藍激楚謳
屢喚奈何無計住平江司馬本風流

雙丸小髻十三餘喉嚨新聲動碧虛
坐中莫有繁休伯誇向人前總不如

碧海漫漫幾度經夢回天上紫微星

君自中書出補司馬新詞

製得從軍樂譜入秦青曲裏聽

斜月晶晶墮綺筵算來已是五更天
泥人一夜嫌人識手炙鶯笙近酒邊

求嚴蓀友楷書離騷經

愛君非一事書畫稱雙絕風格倪雲林姿態趙松雪
而我所用意或亦與時別沅湘有餘波蘭茝堪贈折
皎潔思古人芬芳感時哲豈無架上篇庶得心所悅

感夢五首寄舍弟孝俞揚州

有序

六月廿四夜夢侍家慈坐次忽聞大父喚聲云汝
弟阿仙今復離山陰矣消息云何然弟實在廣陵
非山陰夢中云爾也某私念頃住山陰久何不一
訪之致令相失恐傷吾母意結氣哽咽而醒因思
白香山詩有一夜鄉心五地愁之句吾家家君寓

都下季弟旅泊揚州三年矣余亦頻浪跡三吳僅
仲弟時依膝下正合香山此句枕上口拈不知其
淚之承睫也

憶別閬亭夜離憂更幾翻來曾驚汝瘦去復共誰存
酒散紅橋舫燈青白下門天涯同此感歸日與重論
老祖慙慙屬憐渠未定音非關今夕夢祇是隔年心
別淚虛盈把家書總勝金東吳知不遠消息倘相尋
近有長安信兼從吾父歸已知絲鬢髮只是戀庭闈
朔氣迎寒早鄉心入夜微燒殘紅燭淚待汝共沾衣
白髮倚閭母終朝望幾回但聞人謦欬只道汝歸來

訪藥心徒切求仙願頗乖

弟尋師學道閉關於廣陵

淮南莫留滯

子職在南陔

有弟安耕鑿時能在母傍烹魚怡永晝共被忽他鄉
歸夢迷途怯殘更帶雨長他年白太傅曾此一沾裳

致道觀七星檜

眼前榮謝誰能定七檜今唯一檜留世比桃源忘晉
魏人同藝苑失應劉摧殘老幹難棲鶴剝落空堦罷
舞虬欲問興亡天監事坐來陰雨殿中秋

客有爲八燈詠者戲和其四復補以村燈爲五

首

客燈

正是黃昏後鄉心折此時欲知愁黯黯已照鬢絲絲
候館風吹入關山月上遲孤光如肯借一爲寄相思

舟燈

林端澹明滅蕩漾若空浮漸聽櫓聲疾始知江上秋
近村迎犬吠隔浦避猿愁縱有洛生詠非同載月遊

佛燈

夜深猶炯炯僧定復沈沈照物本無象映空詎有心
座殘龍虎睡臺淨薜蘿陰自得雙峯法孤懸直至今

書燈

殘編復何許磨滅照逾明欲滴羈臣淚難啼別婦聲
虛堂空萬籟默坐自三更風雨年年夜何人最不平

村燈

最宜江上望頻向樹中看雜雨光還潤穿林影未安
全家事機杼隔水靜漁竿詎似城南夜銀缸對倚闌
初秋雨後同嚴蓀友秦對巖

雨過林木淨遲遲生夜涼微雲逗殘月流影照空堂
良會豈在衆晤言貴不忘因君拂枕簟一夢松風長
惠山中秋同蓀友樂天對巖

暮色經檐動晴雲拂沼微遙知此夜月千里共光輝

詎惜鄉邑遠應憐朋舊稀瑤尊罷清酌華館啓重扉
松影澹侵屐桂香暗落衣弄泉潺湲響看雁疏密飛
步履憇禪宇趺石臨釣磯側聽鐘磬寂俯窺菱荇肥
攀芳肯辭倦冥悟忽忘機懷古憶吳竇清詞麗珠璣
復思蘇黃侶轉眼時代非青山同偃仰皓魄長因依
聚散豈常定心期終不違佳人緬空谷上客阻彤幃
念往各有述循愚焉足幾人生重會面聊以慰將歸

石坪玩月

已過三五夕復此石邊行缺月散林影空潭流夜聲
各持千載意聊共一尊傾古寺鐘初歇悠悠非世情

夜坐

細雨月中落高齋應夜分
暗螢棲不定斷雁溼能聞
寒逼垂簷樹愁多入浦雲
他時吾憶女蕭瑟此論文

歸舟過吳門讌繆子歌起宅時新第歸省

輕風澹沱木蘭舟主人簫鼓下長洲
垂楊掩映半塘下主人迴鞭珠勒馬
借問主人何來此新從對策明光裏
指陳民瘼至尊憂言及公等宦者超制科策
士建元年自後垂拱御殿前名姓紛紛矜第一如君
卓犖幾人傳前年餞酌閭亭道君向長安我東棹豈
關別淚濺衣裳自有悲歌激蒼昊篋衍猶餘短長字

盡是蒼生不平事一朝升沈異霄壤萬里會面如夢
寐朱旆卸却衣斑斕宮錦剪製來人間丈夫登朝託
知己歸侍白髮多歡顏人生此樂誠未闕銀燈照耀
青尊閒承歡貴賤良不異布袍襪被吾亦還

題南齊旌表華孝子小像

并序

孝子諱寶父豪晉義熙末戍長安時孝子年八歲
臨別謂曰須我還當爲汝上頭旣長安陷孝子七
十不婚冠有問者輒號慟彌日按史劉裕以義熙
十三年秋八月至潼關命王鎮惡大破姚丕軍遂
入長安其年十二月裕將東還三秦父老留之不

得以弱子義真都督雍涼秦州軍事留鎮之豪戍
長安當以此時旣而沈田子以掩殺王鎮惡伏誅
長史王脩被讒死羣情解體夏王勃勃遂進據咸
陽走義真積人頭爲京觀號髑髏臺此十四年十
一月事也豪豈以此時陷沒而不得還耶從此中
原分裂生靈塗炭於戰爭又百餘年然後合而爲
一其遺禍烈矣劉裕之罪可勝誅乎而孝子之所
痛者特其父也然自古篡竊之臣若王莽懿操父
子俱未嘗親弑其故主也至零陵賊殺自後禪授
之際習以爲常裕之子孫亦嘗身罹其毒而君臣

之道苦矣獨孝子終身思父不婚冠此其所關於
人倫甚大蓋與晉徵士之風異事而同軌者也嗚
呼忠孝名節者國之大綱大常而人類之所以不
滅顧失之上而得之於下豈不尤可貴重歟南齊
時同郡有薛天生劉懷胤兄弟皆以孝行旌然予
獨以孝子之所遇有足感者故疏其事於像左且
繫之以詩

平朔門前萬馬迴長安歡動聲疾雷羗曾反接渡江
來南朝太尉作事乖心圖九錫苦欲回十三兒子何
爲哉兩雄攫拏鬪不開忠臣斷頸長禍胎赫連潰師